

Pendicularas dal Grischun avant grondas sfidas

La bilantscha da la stagiun d'enviern 2016/17 è ualti gigena

DA MARTIN CABALZAR

■ Bler sulegl, pouca naiv, temperaturas fenomenalas da primavaira ed il ferm franc svizzer mettan las pendicularas dal Grischun avant novas e grondas sfidas. Era sch' il dumber da giasts è creschì levamain per 0,5% ed il regav da transport per 2,7% en cumparegliaziun cun l'onn precedent è la bilantscha da la stagiun d'enviern 2016/17 magari gigena. Tenor il nov president da las Pendicularas dal Grischun Martin Hug restan las sfidas per las pendicularas vinavant grondas.

Sco ultima staziun da skis dal Grischun ha la Diavolezza terminà ils 21 da martg la stagiun d'enviern 2016/17. Ina sesiun difficila, sco quai ch' il monitoring da l'organisaziun Pendicularas dal Grischun illustrescha. Bain han las Pendicularas dal Grischun cuntanschì l'enviern 2016/17 in augment da giasts da 0,5 pertschient en cumparegliaziun cun l'onn passà che è stà il mender dals ultims 15 onns. L'augment correspunda a radund 30 000 emprimas entradas. En cumparegliaziun cun la media represchentativa da tschintg onns da minus 7% e da minus 14% da la media dals ultims nov onns sa relativescha il resultat dentant marcantamain. La svieuta dals stabiliments da transport da l'enviern 2016/17 è bain creschida per l'emprima giada dapi l'enviern 2012/13. En cumparegliaziun cun la media dals ultims tschintg onns è quella dentant per 2,7% u per 13,5 milliuns francs pli bassa. Sin il sector da la gastronomia han ils manaschis pudì augmentar lur svieuta per 4,2%

Ferm franc e mancanza da naiv

Ils motifs per quest svilup da la svieuta èn evidents. Dad ina vart chaschuna il ferm franc svizzer vinavant gronds quitads a l'economia turistica svizra. Da l'autra vart han las capriolas da l'aura de-



Martin Hug (a dretga) ha surpiglià il presidi da las Pendicularas grischunas da Silvio Schmid (a san.).

MAD

plorablamain chaschunà ina tendenza negativa e sensibla per la bransch da pendicularas ch'è fermamain dependenta da l'aura.

Tenor l'Institut da perscrutaziun da naiv e lavinias a Tavau va l'enviern 2016/17 en las annalas sco enviern cun la pli pouca naiv. Las regiuns da skis dal Grischun èn sa legradas fitg cu la naiv è vegnida en quantum detg ampel gia mez november. Il plaschair è dentant stà da curta durada. En consequenza dal ferm favugn è la naiv prest luada. Legraivlamain han las temperaturas lubi da far naiv artificiala. Uschia èsi reussì a la gronda part da las destinaziuns grischunas da

porscher als giasts gia da Nadal ina buna purschida da pistas. Pli dira è la situaziun stada per las destinaziuns senza infrastruttura d'ennavar. Ellas èn stadas la segunda giada sco sin spinas da betg avair pudì giudair la naiv durant ils firads da Nadal e Bumaun. Malgrà ch'ins ha già bleras ideas e purschidas innovativas n'han ins betg pudì cumpensar las perditas.

L'ulteriur temp ha i dà sulegl detgavunda, uschia ch'ins ha tuttina pudì far speranzas per ina buna fin da la stagiun. Deplorablamain n'èn era questas speranzas betg vegnidas ademplidas. Las temperaturas memia autas per da quest temp e la plievgia han effectua che la satiglia co-

za da naiv è er anc luada. Plinavant han era las temperaturas memia chaudas en la Bassa gist anc effectua che blers giasts han preferì da star a chasa.

Il terz schlet enviern en successiun sco era la fermezza dal franc svizzer han laschà enavos fermes fastizs tar las Pendicularas grischunas. Las singulas interpresas da pendicularas stattan avant grondas sfidas. Dad ina vart ston vegnir tschertgadas vias d'optimar il manaschi e producir anc pli bunmartgà, da l'autra vart sa tracti da betg negligir renovaziuns necessarias ed investiziuns remplazzantas per pudair mantegnair in bun nivel da qualidad.

Facit dal nov parsura Martin Hug

L'enviern passà haja documentà ina giada dapli quant impurtants ch'indrezs d'ennavada èn per las pendicularas, dentant era per ils ulteriurs partenaris, sco la hotellaria, la parahotellaria, la gastronomia, dentant er il mastergn e commerzi profitan indirect dals indrizzs d'ennavada.

Il giast fetschia vacanzas en muntogna primarmain per exercitar il sport d'enviern e betg per giudair in program alternativ. Quai documenteschia ina cumparegliaziun dal dumber da giasts e dals regavs da las interpresas cun u senza indrizzs d'ennavada cleramain, punctuescha *Martin Hug*.

Sch' il maun public veglia promover e gidar l'economia turistica e cunzunt las pendicularas, lura possian ins far quai il meglier tras procurar per bunas cundiziuns accumpagnantas sco deregulaziuns, reduenziun da las taxas, proceduras pli speditivas ed efficientas etc. I dettia avunda meds e cudezs finansials, constatescha Hug. Primarmain manchia tar l'administraziun e tar la politica la voluntad da re-examinar e reponderar las leschas, ordinaziuns e directivas existents e da surpigliar la voluntad per novas decisiuns.

Sco quai che Hug constatescha sajan las societads da pendicularas periclitadas da l'atgna concorrenza. Las strategias da pretsch actualas da tschertas interpresas stoppian vegnir reponderadas en vista al fatg che mo ina terza da las societads da pendicularas da la Svizra haja meds sufficients per finanzia il remplazzament necessari dals indrizzs da transport. «Quai che po forsa far plaschair al giast sa ruinar in'interpresa e schizunt periclitari in'entira bransch», avertescha Hug. La midada da structura vegnia uschia accelerada per atgna culpa da las pendicularas.